

Mi cjati come chel contadin che al à di bot finide la sô cumierie, che al à fat plui di ce che al pensave di fâ e che, impen di metisi a frignâ parcè che al sta finint la sô vore, al è content e seren pal toc che al à fat. Timp di belanç cheste nestre tierce etât ma ancje timp di contemplazion. Timp di cjâlâ indaûr par gjoldi di ce che si à fat, plui che par lamentâsi e disperâsi par chel che no si à rivât a fâ e par jessi rivât insomp. Mi cjati come chel viandant che al à cjaminât e cjaminât cirint di dâ un sens e une direzion e un valôr al so pelegrinâ, che plui di une volte e di dôs al è stât un torseonâ, un girâ a vueit, e duncje un timp strassât, se no vessin la grande furtune, in gracie dal boncûr di Diu, di riscatâ ancje la part negative de nestre vite e lis nestris esperiencis plui brutis e umiliantis par chel misteri che si clame redenzion e pardon e pedagogjie dal mâl. Chel mâl fisic o morâl che al pò diventâ risultive di umiltât, ma ancje di fiducie, ma ancje di tolerance e di sapience. Chel mâl che nus sburte inmò di plui tai braços dal unic sant, dal unic Signôr, dal unic Altissim, Gjesù Crist (*“Tu solus Sanctus, tu solus Dominus, tu solus Altissimus, Jesu Christe”*). Tant che lu ài cjantât e cun tante comozion!



GLESIE FURLANE
Vie Zara, 10
33030 - Vilegnove di San Denêl


www.glesiefurlane.org

ISBN 978-88-6064-041-3

Antoni Beline
de senectute

6
GLESIE FURLANE
RESULTIVIS

GLESIE FURLANE RESULTIVIS



de senectute

Antoni Beline



PRESENTAZION

A son bielzà doi agns che pre Antoni al à lassade la sene di chest mont. Jo, ma o crôt ducje chei che lu à cognossût, stimât e scoltât, o sint ancjemò tant la sô mancjance, la sô amicizie, la sô perauale, la sô riflession, la sô cuintriletture su lis vicendis, lis problematichis e i dibatits che la storie umane ancje nestre e continue a furnînus. La sô mancjance le sint ancje tante int che no à vude la furtune di incuintrâlu di vîf, ma che ultimamantri si è svicinade ai siei scrits e cumò i dûl il cûr di no vêlu cognossût di persone.

A distance di doi agns, Glesie Furlane e vûl ricuardâlu proponint chest scrit inedit “**De Senectute**”, une riflession su l’ultime stagjon de vite. Inedit e, magari cussì no, ancje incomplet. Pre Antoni al veve a pene scomençât a meti man: pocjîs pagjinis splendidis. Come ducj i siei scrits si lu lei intun flât e cuant che si rive insomp al displâs che il discors si fermi a colp. Cun chel straordenari “*Grazie, Signôr, ancje dal mâl là che nol siere lis virgulutis e nol met il pont, parcè che alc al veve di continuâ a scrivi. Cussì lu vin lassât!*”

Par capî materialmentri cheste ultime fadie o doi lis datis che il so compiuter al segnave. Il file cu la **Tabele**, une sorte di telâr dal libri e che o metin al inizi de publicazion, al ripuarte cheste note:

“Data ultima modifica: martedì 30 gennaio 2007 ore 15,56”. Al è duncje sul scomençâ cuant che al bute jù la liste dai arguments, prime di inviâ il lavôr. Il file cul **Test** al ripuarte cheste note: “Data ultima modifica: giovedì 19 aprile ore 15,38”. Trê dîs prime che il so cûr si fermàs.

La Tabele provisorie che al veve preparât e je componude di 25 titui. Di chescj ant reste svilupâts sîs e scomençât il setim. Si trate duncje di une minime part. Ancje leint i titui dome segnâts tal telâr, si à l’idee di trop golôs e impuartant che al jere l’argument par ducj nô ch’o vivin tune societât che no amet di invecjâ, che no vûl preparâsi e dâ sens al ultin pas de proprie vite: bruts segnâi di insipience umane!

Leint chest inedit si à la percezion che pre Antoni al sintive di jessi rivât dapît; il fisic lu steve molant: “O sint che il soreli al sta lant a mont”. Ma si percepìs ancjemò une volte dut il so vigôr interiôr.

In chestis pocjîs pagjinis si cjate poesie e sapience, contemplazion e resonament, fede e calôr uman, serenitât e lancûr, scletece e passionalitât, bibie e vite. Il dut armonicamentri componût. Ancje in chest librut si viôt che se la malatie e veve condanât pre Antoni a stâ fer, stant fer però al veve fate tante strade interiôr.

Cert che cuant che si rive dapît al dûl il cûr a pensâ che al è dome un fruçon di une grande meditazion che l’amî pre Antoni al veve gust di lassânus. Ai 23 di avrîl dal 2007 l’ingjustri al jere finît e la sô vôs no rivave plui a fevelâ. Vôs cjalde e serene che però e continue a fevelânus tal cidin in dut ce che lui nus à lassât scrit. Par chest pre Antoni nol è lât vie, lontan; al è restât presint, dongje di ognun di nô.

pre Roman Michelotti